

Un ricuart di Romano Locci

La Universitât di Udin, che e je stade pensade come Universitât dal Friûl, e je nassude su la fonde di un grop di professôrs di divignince furlane, che si son formâts e a son cressûts academicamentri ta lis diferentis universitâts talianis e che tai agns de fondazion des diviersis facultâts a àn pensât di contribuî a la lôr incesitate e rinfuarciment domandant il trasferiment a Udin. Lis motivazions a sono stadis diferentis. Cualchidun, che nol à mai lassât la cjase in Friûl, al à volût finîle cun agns di pendolarisim e si è trasferît a Udin. Altris a si son trasferîts come ricercjadôrs o professôrs associâts e a àn cjetât achì la pussibilitât di vinci la catedre. Altris ancjemò a àn fat la siele di tornâ te tiere dulà che a son nassûts, dopo vê fat ducj i pas-saços de cariere academiche in cualchi altre Universitât taliane o in cualchi câs foreste.

Romano Locci al à disvilupât dut il so troi sientific e academic in Universitâts dal forest. I Stâts Unîts, la Gjermanie, l'Irlande, Milan a àn contribuî a la sô incesitate sientifiche, disvilupade doprant la lenghe inglese, todescje e taliane. Nassude la Universitât dal Friûl, al è vignût a contribuî al slargjament e rinfuarciment de Facoltât di Agrarie e dal Dipartiment di difese des plantis. Costituide la Societât Sientifiche e Tecnologiche Furlane, al à volût dâ un contribût impuartant ancje a un setôr di grant valôr pe comunitât dulà che al è nassût e al à disvilupât i prins moments de sô formazion. Contribuî a la cessite dal status de lenghe furlane, che no pues jessi dome la lenghe dai afiets e de vite di ogni dì, ma ancje l'imprest di comunicazion dai concets plui avanzâts che a regolin la incesitate da societât moderne.

Doprâ la lenghe furlane in ambient sientific al vûl dî dâ une prove fuar-

te dal amôr che si puarte pe lenghe de comunitât e une dimostrazion impuartante des cognossincis lenghistichis e sientifichis tal stes timp. Vûl di rompi la identificazion che ancjemò masse spes si fâs tra lenghe e dialet, tra un lengaç che il so plen ricognossiment tal ordenament juridic al è stât oti-gnût cuasi incidentalmentri cu la leç constitutive de Universitât dal Friûl tal 1977 e a nivel di sisteme cu la leç dal 1999 tant volude de comunitât furlane, e lis variants de lenghe taliane sparniçadis dilunc la penisule.

Fin dal inizi de vite de Societât Romano Locci al à volût lavorâ in chestis direzions, prime participant a lis voris dal Diretîf, e dopo acetant di assumi la Direzion di cheste Riviste, che le à fate vivi no dome cul so impegn a cirî, coordinâ e corezi lavôrs, ma ancje scrivint articui dulà che al à vût la pussibilitât di contribuî no dome al rinfuarciment dal “status” de lenghe furlane, ma ancje al disvilup dal so “corpus” tal setôr sientific di sô competence.

Cui siei arlêfs e cui colaboradôrs de Riviste o vin volût meti sù chest numar cuasi dal dut dedicât a la sô figure, in maniere di dimostrâ ancje in chest mût il nestri ricognossiment par une grande espression dal lavôr di slargjament des cognossincis e di formazion di zovinis inteligjencis che Romano Locci al à savût disvilupâ te Universitât dal Friûl.

Marzi Strassolt
President de Societât Sientifiche
e Tecnologjiche Furlane